



**PENGERUSI JAWATANKUASA  
KIRA-KIRA WANG NEGARA (PAC)  
MERANGKAP AHLI PARLIMEN PULAI**  
PEJABAT JAWATANKUASA KIRA-KIRA WANG NEGARA  
PARLIMEN MALAYSIA, JALAN PARLIMEN  
50680 KUALA LUMPUR

Tel : 03-2601 7263 / 2698 6852 (DL)  
Faks : 03-2698 9218  
Email : [pacparlimen@parlimen.gov.my](mailto:pacparlimen@parlimen.gov.my)  
Laman Web : <http://www.parlimen.gov.my/pac>

**26 NOVEMBER 2014**

**KENYATAAN MEDIA YB DATUK NUR JAZLAN TAN SRI MOHAMED BERHUBUNG PEMBENTANGAN LAPORAN LAPORAN JAWATANKUASA KIRA-KIRA WANG NEGARA (PAC) TERHADAP PERALATAN OPERASI YANG TIDAK DIGUNAKAN (*COBRA CUTTING EXTINGUISHER*) OLEH JABATAN BOMBA & PENYELAMAT MALAYSIA.**

Hari ini, Jawatankuasa Kira-Kira Wang Negara (PAC) Parlimen Malaysia membentangkan Laporan PAC berhubung perolehan alat *CCS Cobra Cutting Extinguisher E300* milik Jabatan Bomba dan Penyelamat Malaysia di bawah Kementerian Perumahan, Kerajaan Tempatan dan Kesejahteraan Bandar yang dibangkitkan dalam Siri 1 Laporan Ketua Audit Negara (LKAN) Tahun 2012.

**LATAR BELAKANG:**

Pemeriksaan Audit pada 4 September dan 25 September 2012 mendapati sebanyak 4 unit *CCS Cobra Cutting Extinguisher* bernilai RM1.68 juta, setiap satu bernilai RM420,000 yang dibeli melalui rundingan terus daripada Syarikat Kejuruteraan Asas Jaya Sdn Bhd pada tahun 2006 tidak digunakan di empat lokasi Balai Bomba Dan Penyelamat (BBP) iaitu di Balik Pulau, Pulau Pinang; Teluk Bahang, Pulau Pinang; Sipitang, Sabah dan Papar, Sabah.

Jabatan Bomba dan Penyelamat Malaysia (JBPM) melakukan perolehan 116 unit alat *CCS Cobra Cutting Extinguisher* setelah mendapat kelulusan daripada Kementerian Kewangan pada 6 Februari 2006.

Pada peringkat awal JBPM telah menolak tawaran perolehan peralatan ini daripada KPKT melalui surat bertarikh 13 Februari 2006.

Pada 22 Februari 2006, JBPM telah memaklumkan kepada pihak Kementerian Kewangan bahawa pihak beliau tidak memerlukan peralatan ini kerana ianya tidak termasuk di dalam perancangan JBPM di bawah Rancangan Malaysia Kesembilan (RMK 9) . Di samping itu, JBPM tidak mempunyai keperluan yang mendesak untuk memperoleh peralatan ini.

Bagaimanapun, Kementerian Kewangan mengarahkan Jabatan Bomba dan Penyelamat meneruskan pembelian alat berkenaan daripada syarikat Kejuruteraan Asas Jaya Sdn Bhd dengan satu surat pada 10 Januari 2007.

**ISU / MASALAH YANG DIBANGKITKAN**

Pemasangan peralatan ini pada jentera bomba telah pun menimbulkan banyak masalah antaranya ialah jentera menjadi senget, keberatan bertambah, kebocoran pada badan jentera dan masalah teknikal yang lain. Tambahan lagi peralatan-peralatan sedia ada sudah memadai untuk digunakan bagi tujuan memadam kebakaran dan menyelamatkan. Di samping itu juga boleh mendatangkan bahaya kepada pengguna kerana working pressure yang tinggi antara 260 hingga 300 bar.

JBPM dalam tindakan untuk mengeluarkan peralatan ini daripada jentera dan akan dipasang pada kenderaan-kenderaan yang lain. Bagi peralatan-peralatan yang rosak dan melibatkan kos penyelenggaraan yang tinggi, ia dicadangkan untuk dilupuskan.

## **PROSIDING**

- 1) PAC memulakan prosiding untuk Perolehan alat *CCS Cobra Cutting Extinguisher E300* milik Jabatan Bomba dan Penyelamat Malaysia di bawah Kementerian Perumahan, Kerajaan Tempatan dan Kesejahteraan Bandar dengan memanggil Ketua Setiausaha Kementerian berkenaan iaitu Datuk Seri Arpah Abdul Razak pada 23 Januari 2014
- 2) Hadir sama dalam prosiding ini, adalah Timbalan Ketua Pengarah (Operasi) JBPM, Datuk Mahadi Bin Mat Ali dan Penolong Pesuruhjaya Bomba, Hamdan Bin Ali.

## **RUMUSAN JAWATANKUASA KIRA-KIRA WANG NEGARA (PAC)**

1. Perolehan 116 set CCS Cobra bernilai RM48.72 juta adalah dianggap satu pembaziran kerana tidak sesuai dan tidak diperlukan.
2. Kementerian Kewangan melalui surat bertarikh 6 Februari 2006 telah mencadangkan dan meluluskan perolehan ini secara rundingan terus dengan syarat ada keperluan pihak Jabatan. Walau bagaimanapun, pihak Jabatan Bomba Dan Penyelamat Malaysia melalui surat bertarikh 22 Februari 2006 telah menolak keperluan perolehan peralatan ini. Perolehan ini juga tidak termasuk di dalam perancangan Jabatan Bomba Dan Penyelamat Malaysia di bawah Rancangan Malaysia Kesembilan (RMKe 9).
3. Walaupun Jabatan Bomba Dan Penyelamat Malaysia telah menolak keperluan peralatan ini dan tiada peruntukan dibawah RMK9, perolehan ini masih diteruskan.
4. Penilaian teknikal tidak dibuat secara keseluruhan kepada keperluan perolehan peralatan ini. Masalah kesesuaian peralatan ini dengan jentera bomba sedia ada tidak diteliti.
5. Penilaian terhadap syarikat pembekal iaitu Syarikat Kejuruteraan Asas Jaya tidak dibuat khususnya dari segi *track record* penggunaan peralatan di negara-negara lain.
6. Secara keseluruhannya, PAC mendapati terdapat beberapa kekeliruan tentang proses dan prosedur berkaitan perolehan peralatan ini.

## **Syor Jawatankuasa Kira-Kira Wang Negara (PAC)**

1. PAC menyarankan supaya Kementerian Kewangan mengambil kira maklumbalas tentang keperluan daripada Jabatan terlebih dahulu sebelum meluluskan sebarang perolehan peralatan yang diluar daripada perancangan Jabatan. Satu kajian kemungkinan perlu dijalankan terlebih dahulu bagi memastikan terdapat keperluan untuk menangani krisis seperti kebakaran, keruntuhan bangunan serta kejadian kemalangan yang diluar jangkaan.
2. Kementerian Kewangan perlu menyiasat punca berlakunya kes pembaziran ini dan mengambil tindakan ke atas pegawai yang bertanggungjawab atas perolehan peralatan *Cobra Cutting Extinguisher E300*.
3. Rantai arahan terhadap perolehan ini tiada kesinambungan dan tidak jelas dan terputus dari segi dokumentasi yang boleh membawa kepada ketidakpatuhan tatacara perolehan dan pembaziran.
4. SPRM menyiasat perolehan ini dengan tujuan untuk memastikan ketelusan bagi perolehan berkenaan.